

Kugbɔnkpiεku kua Pɔl kele' ki de' Timote nnɔ Nà wɔngɛh kugbɔnku kuu te ma bo

Pɔl kele' Timote tigbɔnt tule nε. U kele' tɔ ki laa' u caan' Kristo ya tɔan nɔ nɔ ji sɛn' bi li liike yɛ ma bo nɔ Kristo yaab nɔ faake mitekjim ni nε. Timote ya naa yɛ Suf nε ki pε Kristo ya sɛn bo, nε u'baa yɛ grek ka pε Kristo ya sɛn bo. Timote là tε ki sɔnh nin Pɔl nε ki piere' wɔ isɛn yà yɛbe ya jom.

Kugbɔnkpiεku kuu ni, Pɔl tɔkeh Timote u li tien ma kí liike Kristo ya tɔan nnɔ nε. U tɔke' wɔ ki ye binib biba te itɔan nnɔ ni ki wɔknh miwɔknm mà nɔ kpe sɛn (1:3-7; 4:1-4; 6:3-5), ki teh tibont tà te uɛndun wuu ni nnɔ ya tuba nɔ mɔn, ki teh binib nɔ dɔan upiikuɔn, ki la jinh tijier tubambε. Nɛn bo nε Pɔl tɔke' Timote ki ye wɔ nɔ tiere Kristo yaab kí ye: Uwien nɛn' nà kε nnɔ mɔn nε.

U wuɔn' wɔ u li tien ma kí gɛnde itɔan nnɔ ya ciɛnb, ki gbierɛ' binib bε nɔ li pukeh Uwien, kí li kàareh wɔ (iyul 2), ki tɔke' itɔan nnɔ ya ciɛnb li fuobe ma bo (iyul 3).

Pɔl tɔke' Timote ki ye wɔ nɔ li likeh itɔan nnɔ kε mɔnmɔnm (iyul 4-6).

Ifuonde

¹ Min Pɔl, n yɛ *Yesu Kristo ya tond nε. Uwien ti'Nmiɛnl nin Yonbdaan *Yesu Kristo wà yɛ ti'dɛndɛnl nnɔ nε ye nɔ li yɛ u'tond.

² Timote, n kieh kugbɔnku kuu rí de sin nɛ. A yé n'bumɔnk kí ñe ti ñmɔbe mitekjim mà nnɔ bo nɛ. Baa Uwien nin Yonbdaan *Yesu Kristo rí juoke ñe, kí muɔ ñe micɛɛkm, kí de ñe uyenduɔn.

Liike a'yul bo nin biwɔnwɔknɔ bà tulndeh binib nnɔ

³ N là joh Maseduɔnn ya tinfɛnm bó ma nnɔ, n là sure' ñe á juore Efɛs ya du ni, kí pien binib bà te len ki wɔknɔ miwɔknɔ mà ña kpe sɛn nnɔ nɛ.

⁴ Bi la ji rí li tuuke gbeyienkaar nin bi'yaajɛb ya yel yà bi findɛh i'bo ka gbendɛh nnɔ bo. Nɛn nɛ cɛrɛh miniɛm bàareh. Na cɛrɛh binib bɛndɛh Uwien bonde' ma bo wɔ rí ñmien binib kí ñe mitekjim bo.

⁵ N là sure' ñe á pien bɛ ñɔ bɛ rí li yé binib bà ya fɛl bo ña ñmɔbe jɔknt, kí li yíe tɔb, kí li ñmɔbe iyenmaalmɔnmɔn, kí li ñmɔbe mitekjimɔnm.

⁶ Binib biba te, ka ji pɛ u ya sɛn bo, bi tùre' nɛ, ki lienɔ gbɛfɛnfɛnm,

⁷ ki yih bi'ba *Yiko ya wɔnwɔknɔ, ka bɛn bi lienɔ nà nnɔ ya tingi, ki niireh nin bi cɛ nà bo nnɔ.

⁸ Ti bɛn ki ye *yiko mɔn nɛ, nǐ yé unil taah wɔ ki sɔnh itùon nǐ'donbó la.

⁹ Tùre mɛn kí cii kí ye yiko ña te ki de' nimɔn, ama u te ki de' bà ña boh wɔ nin bà yíe' Uwien ya ñɔbu bó nin bà ña pɛ Uwien bo nin bibiɛrdɛnb nin bà yindɛh Uwien nin u'bont kɛ nin bà kuuleh bi'naambɛ nin bi'baambɛ nin bà kɛ yé binikub nin

¹⁰ isɔnsɔnd nin bà dɔan' bipiib ki duɔndɛh nin bi'jetɔb nin bà kuɔrɛh iyonbe nin bitonnɛndɛnb nin bà poleh itonnɛnpòl nin bà kɛ yíe' miwɔknɔ mà kpe usɛn nnɔ nɛ.

11 Mi ya wəknm nε pε tigbεmənəmōnt tà wəngēh Uwien ya kpιεke nnə bo. Uwien uyenduəncien ya daan nε taa' tù ki ηukn' nni.

Pəlfəareh Yesu Kristo

12 Yonbdaan *Yesu Kristo nε de' nni mituəm. Nεn bo nε n faareh wə. U du n'bo nε ki gēnde' nni n sən u'tuonl.

13 Uyo uba n là lienh u'bo fεnfεnm nε, ki jēndeh u'nib, ki bre ka muəh bε cεcεkm, ama u muə' nni micεcεkm, kime ma là bεn n teh bà, ka laan là teke' wə ki jin' mə.

14 Yonbdaan *Yesu Kristo ya juokm yεbe ki gbien' ma nnə nε u cère' n teke' wə ki jin', ki yíe wən nin u'nib kε.

15 Tigber tuu te nε, ki kpε binib n tuu tu'kε. Tun si: *Yesu Kristo baa' uηendun wuu ni, wə n lá ηmien bibierdεnb nε, nε min nε yé ubierdaan ki cεn' bi'kε.

16 *Yesu Kristo muə' nni micεcεkm, ηə min wà yé ubierdaan ki cεn' binib kε nnə bo wə n wuən u ηməbe sukle ki gbien' ma bo nε. Nεn nε li yé kudīεku binib bà li teke wə, kí ji kí ε limiel là ηa ηməbe ghenm nnə bo.

17 Binib kε n li pèkeh Uwien, kí li kpιekreh wə uyo kε. Wən nε yé Uwenbaabe, nil ηa lenh wə, u yé Ubercien wà tuu ki te uyo kε nε. Ami.

18 N'buk Timote, n ye n təke ηε tigber tà sə kí nε bi là sək'n' Uwien ya nəbon yà a'bo nnə. Ni yen bo kí mə limuəl là mən,

19 kí li ηməbe mitekjim nin iyenmaalmənəmōn. Binib biba dāan' i ya yenmaale nε ka ji ηməbe tekjim.

20 Bi'ni bile si: Himene nin Aleksand. Ne n taa' be ki ηukn' Satan, ηο be n bende kί ye na mən be n ji n suke Uwien.

2

Li kàareh mən ki dienh binib ke

1 Nən bo, tigber tà yé tigberkpiekt n li tōke ne si: ní li kàareh ki mieh Uwien, ki gbáanh wə, ki faareh wə ki dienh binib ke

2 nin biberb nin udu ya cienb ke ηο tí li te uyenduən ni, niba la ηaabe ti'yenm, kί li pe Uwien ya sen bo, kί li yé binib bà ya tetem kpe be n li boh be.

3 Nən ne mən Uwien ti'Nmienl ya nun bó ki sange u'yenm.

4 U yíe binib ke n ηmere ne, kί bende kί ye u'gber yé tigbemənt.

5 Kimε Uwien te uba ne. Ucendenduol mə te uba ne binib nin Uwien ya siik ni. Wən si: *Yesu Kristo wà tien' u'ba unisaal,

6 ki tuo' ki teke' binib ke ya kuum ki kpo', ηο wə n de be kί wiε nno. Nən ne wuən' ki ye Uwien yíe wə n ηmien binib u ya yo ne.

7 Nən bo ne Uwien gənde' nni n li yé *Yesu Kristo ya tond, kί li kpaandeh u'gber, kί li wəknh tù bà ηa yé Sufmbe ηο be n teke wə kί ji, kί bende kί ye tù yé tigbemənt ne. Ma nendeh n tōkeh tigbemənt ne.

8 Tə, n yíe Kristo yaab te nà saan ke la, bijeb n li kàareh, ki findeh inuə, ki la cère yi n li yé binib bà ya fəl bo ηməbe tijoknt ya nuə, ki la li ηməbe benpiebe, ki la li findeh nin təb.

Bipiib li ηməbe mitetem mə

⁹ Bipiib ben wən, n yíe be rí li guoh nĩ kpε upii rí li guoh ma bo nε, ki la cère bi guo la, be rí li lenh bi'fε, ki la wəngɛh bi'ba, ki la li lùoh yuldle wà faa, ki la tungeh nòkm ya kenjɔnga wà ya daaku faa, ki la bèleh ilaan yà ya daaku faa, ki la guoh wəngolkaar tà ya daaku faa.

¹⁰ Ama be rí li sənɛh itùonmənəmən. Nεn nε mən ki de' bipiib bà kε lienh ki teh bi pε Uwien ya sən bo.

¹¹ Bi wəknh be uyo wà la, be rí li te suoo, kí li cengeh nin mibom.

¹² Ma rí de be sən be rí wəknh jeb, ka rí de be ciɛnt jeb bo. Be rí li te suoo.

¹³ Kimε Uwien là kpíε' ki n̄ɛn' Adam nε, ki tuən' εfa.

¹⁴ Na yé uwε* là lere' Adam nε, u là lere' εfa nε u saa' likuəl ki bii' Uwien.

¹⁵ Ama upii juore' ki ηməbe mitekjim nin miyíem, ki pε Uwien ya sən bo mənəmən, ka wəngɛh u'ba la, timεr ηa rí cère Uwien la ηmien wə.

3

Kristo ya tɔan yaab ya sɛnlierl li te ma bo

¹ N ye rí təkε tígber tà nɔ̀ t̀ te nε. Unil yíe wə rí li likeh Kristo ya taanl la, u gènde' lituonmənəmən nε.

² Nĩ kpε Kristo ya taanl yaab ya sɛnlierl rí li yé unil wà ηa ηməbe biil nε, kí li ηməbe upii uba, kí li coh u'ba tibont kε ni, kí li ηməbe miyɛnm, kí li yé unil wà bi boh wə, kí li teknh bicɛnb, kí li yé unil wà li fre kí wəknh binib Uwien ya gber mənəmən,

* **2:14** Bi ye uwε la, bi niireh Satan nε. Liike 2 Korɛnt 11:3.

³ ki la taa' u'ba kí de daam, ki la ηmabe jεr. Wə rí li ηmε nin binib κε, ki la findeh nin nib, ki la cère u'nun rí li món ilike bo,

⁴ kí li likeh u'dencεnl mənəmən, kí cère u'bumu rí li ciuh litubl, ki ηmabe mibom nǐ kpe kibuk rí li ηmabe mibom ma bo.

⁵ Kimε unil ηa rí fre kí liike u'dencεnl mənəmən la, u li tien mila kí liike Uwien ya taanl yaab-i?

⁶ U la li yé wà ηa wuəke' Uwien ya sεn ni. U yé unil wà ηa wuəke' Uwien ya sεn ni la, nba la, u li ηmabe tigbengt, nε kí lε utudεre tεn usεnpol.

⁷ Nǐ kpe bà ηa yé Kristo yaab rí li pèkeh wə nε. U te nnə la, nil ηa rí len u'bo fεnfεnm, nε sεnpol ya diεku mə ηa rí cuo wə.

Kristo ya taanl ya totorb li te ma bo

⁸ Kristo ya taanl ya totorb mə li yé binib bà bi boh bε nε, ki la li yé iñuən ilele ya nib, ki la taa bi'ba kí de daam, ki la jinh pònt.

⁹ Kí cère jəknt la li te bi'fèl bo ηə bε rí li pε tigbεmənt tà Uwien kpiire' tù nnə bo.

¹⁰ Bε rí kpiε kí fiin bε kí liike bi'tetem te ma bo kí yaan. Bi laa' ba ηmabe biil la, bi li fre kí li sən h bitotorb ya tòn.

¹¹ Bipiib bà yé bitotorb mə li yé binib bà bi boh bε nε, ki la lien h təb bo fεnfεnm, kí li coh bi'ba tibont κε ni, kí li yé bipiib bà bi du bi'bo isεn κε ni.

¹² Kristo ya taanl ya totorb li ηmabe upii uba uba nε, kí li likeh bi'bumu nin bi'dencεn mənəmən.

¹³ Kimε binib bà sən h bitotorb ya tòn mənəmən nnə ya yel li kpιenh nε. Bi ηmabe midum ki gbien' bi teke' *Yésu Kristo ki jin' ma nnə bo.

Nà cère' Pɔl kele' kugbɔnku kuu nɔ

¹⁴ N kieh ηε kugbɔnku kuu nɔ ki daan n li baa a'saan na ń wuɔke nε.

¹⁵ Ma li baa' tonm mɔnɔn la, kugbɔnku kuu li cère á bende a li ηmɔbe mitetem mà Uwien ya nib ni. Binib nnɔ yé Uwien limiel ya daan ya taanl nε. Li te ten likpenkpenl nε ki co tigbemɔnt ki dienh tù mituɔm.

Uwien kpiire' tigbebalkaar ki wuɔn' binib

¹⁶ Imɔn, Uwien bo ya paanm ya gber tà buɔ u kpiire' tù nnɔ yé tigbecient nε.

Kristo nε yé tigber tà buɔ nnɔ,

ki tien' u'ba unisaal,

ki ńen' u'ba upaan bo

*Mifuoñaanm nε wuɔn' ki ye u yé ugbemɔndaan,

u cère' Uwien ya tondb laa' wɔ,

bi kpaande' u'gber bà ηa yé *Sufmbε ni,

nε binib teke' wɔ uηendun ni ki jin',

Uwien taa' wɔ u'kpieke ni ki don' paaki bó.*

4

Miwɔknm mà ηa kpe sen ya gber

¹ *Mifuoñaanm len' ńi wien ki ye ufɔfɔryo binib biba li wiε mitekjim ya gber, kí paan isenpol tulndeh binib ki cèreh bi wɔknh miwɔknm mà nnɔ bo.

² Bi li cère binib bà yé iñuɔn ilele ya nib, ki yé bitonnendɛnb, ibiere tebe' bi'yɛnm ten kudieku kùà ηa ηmɔbe ηmirm nnɔ, ń tuln bε.

* **3:16** Bi li fre kí lebre *Uwien taa' wɔ u'kpieke ni ki don' paaki bó* kí ye Uwien cère' u'kpieke yebe mɔ.

³ Binib bugben kùndeh upiikuòn nin tijier tubambε ya jim nε. Uwien nε ñen' tijier nnò ηò binib bà teke' wò ki jin' ki ben tigbεmònt nnò ní li jinh tù, ki faareh wò tu'bo.

⁴ Uwien ñen' tibont tà kε nnò, tù mòn nε. Ti la sèngèh tuba, ti jinh tà kε la, tí li faareh wò tu'bo.

⁵ Kimε Uwien ya gbεr nin ikaare nε mòngreh nibonn kε.

Pòl tòke' Timote u li te ma bo u'tuonl ni

⁶ A wòknh Kristo yaab tigber tuu nò la, a li yé wòn *Yesu Kristo ya tonsònl wà mòn, kí cèrè Uwien ya gbεr tà a teke' tù ki jin' nnò nin miwòknhmònmm màmà a tùrè' ki paan' mi'bo nnò ní li yé a'bo tijier.

⁷ La tuuke gbeyienkaar, kimε ta kpe Wien ya sèn. Nikn kí li pε Uwien ya sèn bo mònmm.

⁸ Unil ñikndeh ki tiinh u'gbenent ní jaare la, ñi mòn nε ama ñi li tore wò waamu nε. Unil ñikndeh ki pε Uwien ya sèn bo mònmm la, nen nε li tore wò isen kε ni, kimε Uwien ye nen nε li cèrè binib ní li fuobe fεnfennò wuò nin uyo wà we ní nnò.

⁹ Tigber tuu te nε, ki kpe binib ní tuo tu'ke.

¹⁰ Ti sòn h itùon nin inunmón, ki mòh limuòl, kimε ti ηmòbe lidendènl Uwien limiel ya daan bo nε. Wòn nε yé binib kε ya Nmienl. U cinbe ki yé bà teke' wò ki jin' ya Nmienl nε.

¹¹ Wòkn binib tigber tuu, kí tòke bε kí ye bε ní li teh nnò.

¹² La cèrè uba ní yinde ηε a yé kinacenfèn buk ma nnò bo. Ama li yé wà cuube u'lenm ni, ki ηmòbe mitekjim nin mitetemònmm, ki yíe binib, ka ηmòbe biil ηò bà teke' Uwien ki jin' nnò ní tεkn a'taal ni.

13 Taa a'ba kí de *Uwien ya gbɔ̀nku ya kàanm Kristo yaab ni, kí li sureh bɛ, kí li wɔ̀knh bɛ haali nin n'baam.

14 La dàan *Mifuoñaanm ya paabu bùa te a'ni nnɔ. A laa' bù kí ñɛ bi là sɔ̀kn' Uwien ya ñɔbon yà a'bo nin Kristo ya taanl ya ciɛnb là taa' bi'nuɔ ki paan' a'bo ma nnɔ bo nɛ.

15 Taa a'ba kí de nɛn kɛ, kí sɔ̀n lituonl nnɔ tinɔjɛr tule. Nnɔ nɛ binib kɛ li lɛ a'tùon cuonh ma bo.

16 Liike a'tetem, kí li bɛn a wɔ̀knh binib ma bo, kí li ñikndeh isɛn kɛ ni. A teh nnɔ la, sin bugbɛn li ñmɛre, nɛ bà cengeh a'bó nnɔ mɔ li ñmɛre.

5

A li te ma bo nin Kristo yaab

1 La gbierɛh jɛciɛn nin jɛr, ama li gbierɛh wɔ̀ tɛn a'baa, kí li gbierɛh binacɛnfɛ̀nb tɛn a'ninjiɛb,

2 kí li gbierɛh ipiiciɛn tɛn a'naambɛ, kí li gbierɛh bijɛfɛ̀nb tɛn a'ninsɛb, kí la kuɔ̀n a'ba jɔ̀knt nin bɛ.

3 Li toreh bikpopiib bà ña ñmɔbe bà likeh bɛ.

4 Ukpoppi ñmɔbe mubumu bii iyaabii la, ñi mɔn bɛn nɛ ní kpɛ kí li toreh bi'den yaab, kí wuɔ̀n kí ye bi boh bɛ. Bi teh nnɔ la, bi jiindeh bi'naambɛ nin bi'baambɛ bi là wube' bɛ ma nnɔ bo nɛ, kimɛ Uwien ya yɛnm sɔ̀nge nɛn bo nɛ.

5 Ukpoppi wà ña ñmɔbe wà li likeh wɔ̀, ki juore' ki te u'ba kpɛin la, u du Uwien bo nɛ, ki tuu ki kàareh ki miɛh wɔ̀ ñɔnku nin wien ni.

6 Ama ukpoppi pɛ lisɔ̀nsɔ̀ndl bo, ki teh u'yɛnm yíe nà la, nin u fuobe ma kɛ nnɔ, Uwien ya sɛn bo wɔ̀n, u kpo' ñɔ.

7 Tɔ̀ke bikpopiib tigbɛr tuu nɔ ñɔ nib la lɛ bi li dule nà bo kí biin bɛ.

8 Wà ña toreh u'yaab, ni'ke tu nin wa toreh u'tiema dencenl ni yaab la, u wie' mitekjim ya sen ne, ki bre ki cen' wà ña teke' Kristo ki jin'.

9 A li kele ukpopii wà ya yel bikpopiib ya yel ya gbɔnku si: wà tì fii' ma, u kun' ticer miba kpein ne, ki ñmabe ibin piluob.

10 U li yé upii wà sɔnh itùonmɔnmɔn binib ke pèkeh wɔ i'bo ne. Yen si: u wube' u'bumu mɔnmɔnm, ki teke' bicenb, ki sɔkre' Uwien ya nib ya taan, ki tore' bijiinb, u'nun mɔn wɔ n li sɔnh itùonmɔnmɔn.

11 Bikpopiib bà fàan ben wɔn, dàan be, kimε bijeb ya menku lá cuo' be la, bi li wie Kristo ya gber ne, kí li nuunh be n liebe kí kun ticer,

12 ka n sɔn bi là len' ki ye bi li sɔn Kristo ya tuonl là nnɔ. Nen bo ne bi li ñmabe libiil.

13 Ba ñmabe tòn ma nnɔ, bi li cuonh ki lindeh inien ne. Na yé ba ñmabe tòn baba ne, bi li yé biñɔkrɔbdenb ne, kí li kɔh binib ya gber ni, kí li lienh gbefenfenm.

14 N yie bikpopiib bà fàan nnɔ n liebe kí kun ticer ne, kí maa mubumu, kí li likeh bi'den mɔnmɔnm, ki la cère' unennend n le u li dule nà bo kí len ti'bo fenfenm,

15 kimε bikpopiib biba wie' Kristo ya sen ne ki paan' *Satan bo.

16 Upii wà teke' Kristo ki jin' ki ñmabe bikpopiib u'den la, wɔ n li toreh be, ki la cère be n li yé Kristo ya taanl bo tukl, ñɔ lè n fre kí li toreh bikpopiib bà ña ñmabe bà likeh be nnɔ.

17 Kristo ya taanl ya cienb likeh Kristo yaab mɔnmɔnm la, bi kpe be n li boh be, kí li pèh be

mənmənm nɛ. Ni'kɛ tu nin bə kpaandeh Uwien ya gbɛr, ki wəknh tū nin inunmón nnɔ;

¹⁸ kimɛ nĩ kɛlɛ' *Uwien ya gbɔnku ni ki ye: «A taa' unɛ u taanh iji la, ɲa ń lɔle u'ńɔbu», ki liɛbe' ki ye: «Wà sɔnh lituonl la, u kpɛ bɛ ń pɛ wɔ u'paaku nɛ.»

¹⁹ Bi biin' Kristo yaab ya ciɛn la, na yé m̀nkunb bile bii bita nɛ biin' wɔ la, la cenge tū.

²⁰ Kristo yaab ya ciɛnb ya uba tien' ibiɛre la, kɔnh nin wɔ binib kɛ ya nun bó ɲɔ bə s̄ien' nnɔ ń fenge.

²¹ N sureh ɲɛ Uwien nin *Yesu Kristo nin Uwien ya tondb bə ciɛ' u'ńɔbu bó nnɔ ya nun bó nɛ, li pɛ n wuɔn' ɲɛ isɛn yà nɔ bo, ki la ɲmɔbe a'ńɔbu gbɛ nà bó, ki la ɲmɔbe gɛngɛnde mɔ.

²² A ye á de unil lituonl Kristo ya taanl ni la, la yíe tonm kí pək kí yuon a'nuɔ u'bo kí kàare kí de wɔ. La kɔ tɔb ya biɛre ni. Cɛre sin bugbɛn ya tetem ń li wien.

²³ A tuu ki bungreh ma nnɔ, la li ńuh ńunm baba, li lengeh midaam mɔ waamu, ɲɔ nɛ ń li toreh a'benku.

²⁴ Bi lɛnh binib biba ya biɛre upaan bo nɛ kí yaan kí bu bɛ tibuur. Bitɔb mɔ yi ɲa kpiireh tonm.

²⁵ It̀onm̀m̀m̀n m̀ te upaan bo nɛ. Iba li buɔ m̀ǹn la, ya ń juore kí li buɔ.

6

Iyonbe nin i'cɛnbaambɛ ya gbɛr

¹ Binib bə kɛ yé iyonbe nnɔ bɛ ń li boh bi'cɛnbaambɛ m̀m̀m̀m̀, nĩ kpɛ bɛ ń li boh bɛ ma bo, ɲɔ uba la lɛ u li dule nà bo kí len Uwien nin ti'wəknh bo fɛnfɛnm.

² Iyonbe yà ya cɛnbaambɛ teke' Kristo ki jin' nnɔ, i la likeh i'cɛnbaambɛ nnɔ fɛnm, kí ye bi yé i' ninjiɛb

ma nnɔ bo. Ama yĩ rí li tùɔreh ki sɔnh lituonl ki dienh bɛ, kime bɛn bà jondɛh i'tuon bo nnɔ yé bà teke' Kristo ki jin' Uwien yíe bɛ nɛ.

Miwɔknm mà ña kpe sɛn ya gbɛr

A li wɔknh binib nà sɔ, ki sureh bɛ bɛ rí li teh nnɔ.

³ Unil wɔknh miwɔknm mà bore' miba, ka pɛ ti'Yonbdaan *Yesu Kristo ya gbɛmɔnmɔnt bo, ka pɛ miwɔknm mà kpe Uwien ya sɛn bo la,

⁴ tigbengt nɛ yɛbre' nin udaan nɛ wa bɛn niba, ki fɛ miniɛm, ki findɛh iñɔbon bo. Nɛn nɛ cèrɛ' ibinbinbe nin ikɔnkɔn nin isuk nin itɛnfuonbiere te,

⁵ ki cèrɛh binib niɛh miniɛm ka gbɛndɛh, kime bi'yɛnmaale ña kpe sɛn, nɛ ba bɛn gbɛmɔnt. Bi maaleh ki teh bi paan' Uwien ya sɛn bo la, bi li lɛ lifaal nɛ.

⁶ Imɔn, unil ya yɛnm sɔnge u ñmɔbe nà bo, ki pɛ Uwien ya sɛn bo la, nɛn nɛ yé lifaacienl ki de' udaan.

⁷ Kimɛ ta tuke' niba ki baa' uɛndun wuu ni, ka rí tuke niba kí ñɛ u'ni mɔ.

⁸ Nɛn bo, ti ñmɔbe tijier nin tiwɛngolkaar la, cèrɛ mɛn ti'yɛnm rí li sɔnge tu'bo.

⁹ Ama binib bà ya nun mɔn lifaal bo nnɔ luh mibiikm ni nɛ. Tijɔrbont tà yɛbe, ki bre ya mɛnku li cuo bɛ tɛn kudiekɛ, kí cèrɛ bɛ rí kɔ mikuum ni kí juore fɛnm.

¹⁰ Kimɛ ilike ya yíem yé ibiɛrɛ kɛ ya ñaan ya uba nɛ. Binib biba taa' bi'ba ki de' ilike ma nnɔ nɛ ki tùrɛ', ka ji pɛ tekjim ya sɛn bo, nɛ ki nuun' bi'ba bo ijɛndciɛn.

¹¹ Sin Uwien ya nilɔ, la paan nɛn kɛ bo, kí li yé unil wà cuube, kí li pɛ Uwien ya sɛn bo, kí li ñmɔbe

mitekjim, kí li ηmabe miyíem nin kuminku, kí li ηme nin unil ke.

¹² Mò mitekjim ya muəl mənəm, kí li nuunh limiəl là ηa ηmabe gbenm. Uwien yin' ηe li ya miəl bo ne, kí ñe lidaali là a len' mənəm bimónkunb bà yebe ya nun bó ki ye a teke' wə ki jin' nnə.

¹³ N sureh ηe Uwien wà dienh tibont ke limiəl nin *Yesu Kristo wà là kun' imən mənəm Pəns Pilat saan nnə ya nun bó ne.

¹⁴ Li boh n təke' ηe nà ke nnə, kí li wien, kí la li ηmabe biil kí tí baa uyo wà Yonbdaan *Yesu Kristo li baa ní nnə.

¹⁵ Uwien sien' uyo wà nnə lá baa' la, u li cère wə ní baa ní. Uwien ne yé uyenduən ya daan. Wən baba ne yé tibont ke ya Cenbaa, ki yé biberb ke ya ber, ki yé yonbdenb ke ya Yonbdaan.

¹⁶ Wən baba ne ηa ní kpo, ki te kuwenwenku kùa ni uba ηa ní fre kí kə ku'ni. Uba ηa kpele ki laa' wə, ka lí li fre kí e wə mə. Wən si kupenpeku nin mituəm uyo ke. Ami.

¹⁷ Təke binib bà yé bifàadenb uηendun wuu ni nnə kí ye bi la li ηmabe gbengt, ki la li du lifaal nnə bo, kimε lí yé mitafaam ne. Ama be ní li du Uwien bo, kimε wən ne dienh te tibont ke ki gbiekeh ηə tí li jondeh tu'bo.

¹⁸ Təke bifàadenb nnə kí ye be ní li teh miməm, kí li sənəh ituən yà mən ki gbien', kí li punh ki la cuəleh, kí li gbiinh bi'bont nin binitəb.

¹⁹ Bi teh nnə la, bi taakeh lifaal là mən ka ní saa ne ki blinh bi'ba wenli bo be ní wun e liməmən.

Tigbərkaar

²⁰ N'yo Timote, li likeh Uwien guun' ηe nà nnə mənəm. La paan gbefenfenm bo, kimε tà kpe

Wien ya sen, ki la paan bi nieh miniem mà ki maaleh ki teh bi ηmabe mibenm nnə mə bo.

²¹ Binib biba lienh ki teh bi ηmabe mi ya benm nε ki ture', ka ji pε tekjim ya sen bo. Uwien ní juoke nε.

Uwien ya Jɔtiefɛnku ya gbɔnku
The New Testament in the Ngangam language of Togo
copyright © 2011 Wycliffe Bible Translators, Inc.

Language: Ngangam

Translation by: Wycliffe Bible Translators, Inc.

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Ngangam

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 18 Apr 2025 from source files
dated 29 Jan 2022
f30fbe0b-cda1-5a60-a4ee-8be80c6caef6